

Timoti 1 na letama pakanama

Pol na waikaiwama

¹ Mamaitua tauwai yawasanidama be Yesu Keriso, taudi a vinegu be a riu vavasagegu da taugu Pol apasol è tubugana. Be Yesu Keriso tauna vutuna tà raberabena da tokare tà kitana.

² Tam Timoti garome uma letanama ya girugirumina. Am waisumaḡe tam taugu natugomiguma.

Tamadama Mamaitua be dà Badama Yesu Keriso adi raukiviverema, adi raunuatoima be adi subama garome ta kenana.

Tauwai katakatai kaikaiyovudima kwai ḡakedina

³ Raḡanine taugu Masedonia provinsnama naḡonama aubainama, taugu è riu vavasagemna da tam Epeses meagainama nopone kwa mia be tauwai katakatai kaikaiyovudima matabudi kwai ḡakedi da nam kaiyovue banaga tai katakataidi. ⁴ Be mate taudi nam giu poredima kaikaiyovudie* bo kimta poredima ḡarodie sibo yawasana a kerikeri wanedi. Inam kaudie taudi adi raḡanima tawai yakaredina. Taudi nam sibo inam yabedima ai tarapiriedi be a kawa nuaraḡeraḡedi, baninama inam kaudie waikawa saḡasaḡa ta tubutubugana.

* **1:4:** Giu poredima maika wamba kumakuma, be ḡesaudima mate.

Inam kauidima tokare nam dà waisumaḡe ta saguda, be Mamaitua tòi muriwatane, ibewa. ⁵ Yau riuwavasagāma yà riuriuemna tokare na damonama inam wainuapaḡo. Be inam wainuapaḡonama inam nopodima vereverene be adi noḡotama vereverene tai nuapaḡona. Yodibe adi waisumaḡama tokare ei rewapana, be tauwai katakatai kaikaiyovudima nam tai muriwatanedi.

⁶ Be banaga ḡesaudima inam yabedima veredima kaiteka a gosedi, be giu kavekavedima tawai tarapiriedina. ⁷ Taudi ta noḡonoḡota munagēdina da taudi kabe tarawatu tauwai katakataidima veredi, be ibewa. Be avedi da adi giuma vaiedima ai rewapana kauana, be yaḡoro taudi aba ta giugiuēdina, banidima nam ti kataiedina. ⁸ Tauda tē kataiena da tarawatu inam yaba verenama, deḡoda tarawatu banaga tà giu waibatedina. ⁹ Be mate tē kataiena da Mamaitua tarawatu ya voiena nam banaga veredima aubaidi, ibewa da banaga gewegewedima aubaidima,

- taudi aitaūḡa tarawatu tauwai katikotovidima,
- aitaūḡa tarawatu taurawaḡaiḡaiedima,
- aitaūḡa Mamaitua tauriutuatuagāienama,
- aitaūḡa gewagewa tauwai nuapaḡoenama,
- aitaūḡa nopo miremiredima,
- aitaūḡa Mamaitua tauwai diboginama,
- aitaūḡa tametamedi, tinetinedima be banaga ḡesaudima mate tauwai guridima.
- Bo aitaūḡa ¹⁰ tauwai soḡa yabayababa,
- aitaūḡa monamonagēdima ta gosedi be ta naḡo waiwaivi adi banagama waiwaivi mate

be tautauḡoma adi banaga tautauḡoma mate tawai kawa soḡana,

- taudi aitaugā banaga ta danenedi be ta rarau gimaredina,
- taudi aitaugā tawai kaikaiyovu be etare tawai bovivovina,
- be taudi aitaugā yaba toitoi gewegewedima ta voivoiedina, be inam yabedima Mamaitua na waikatakataima didimanidima nopodie nam tima kenakena.

Inam nama banegidima aubaidima Mamaitua tarawatu ya voiedina. ¹¹ Be waikatakatai ri-uriukauinama inam vari verenama nopone e kenakenana. Inam varinama vutuna Mamaitua ya utegu be yà rarau guguyena. Tauna vutuna boruboruminama, be ya vere vavasagāna.

Pol Mamaitua yai kaiwena na raunuatoima aubainama

¹² Taugu èi nuavere kauana, baninama dà Badama Yesu Keriso rewapana ya utegu be ya noḡoti da taugu patupatutuguma, vutuna aubainama ya vinegu da taugu na noyama yà voivoiena, ¹³ avedi da taugu boni sorukeakea banegiguma, Keriso èwai diboḡi, be tauwai sumaḡenama è raraukivi gewegewedina. Be Yesu Keriso ya raunuatoieguna, baninama inam raḡanine taugu nam e kataiena aba è voivoie. Inam raḡanine taugu yaḡoro nam ewai sumaḡana. ¹⁴ Be dà Badama na raunuatoima ḡarogue ya yovo be ya voiegu da tauna èi sumaḡe, be wainua-paḡo nopoguma ya moḡavuna. Deḡoda tauda dà Badama Yesu Keriso mate tà mia tenaḡana, inam kaididima nama tokare ḡarode ta tubuḡana.

¹⁵ Banaga matabudi sibo a kataie da taugu aba yà giuena inam giu riuriukauinama be taudi sibo ai aninena: Yesu Keriso dobue ya yovona, banaga gewegewedima ei yawasanidina aubainama. Be matabudi nopodie taugu naumeki è gewagewa vavasagana, ¹⁶ vutuna aubainama Yesu Keriso ya raunuoatoguna da tokare banaga matabudi garogue ta kita be ta kataie da tauna ewai raba nuetauna da gewagewa banegidima tokare yawasana kenakena nonoginama e utedina, degoda taudi Keriso tai sumağena rağanine. ¹⁷ Mamaitua tauna guyau miamia nonoginama. Tauna miamia moisirinama be guri nam i kataiena, tauna taunağa vutuna Mamaitua, be banaga matabuda sibo tauna isanama tè kawa sağe be tè kaisuğusuğu nonoğena. Inam riukaua.

Pol Timoti nuanama ya boruna

¹⁸ Timoti natuguma, uma giudima taugu yà riuemna: Aba noğone awai perovetaena garome ta tubuğana, vutudi kwa noğotidina. Tam inam riudima kwa ragaudi be vari verenama aubainama kwai gavia kauana. ¹⁹ Be am waisumağama kwa kaididi da badonağa, be noğota didimanidima aba nuama e riuriuemna nama kwa voiedina, inam kedane tokare kwai gavia kauana. Banaga gesaudima taudi noğota didimanidima aba nuedima ya riuriuena nama nam ti voiedina, be tauwai katakatai kaikaiyovudima awai muriwatanedina. Vutuna aubainama adi waisumağama ya kovina, maika waga kabe kira debane i raukaisağa be i

monumonu. ²⁰ Tautauḡoma rabui isedima Himeneas be Alexandra taudi mate inam banegidima nopodie. Vutuna aubainama Seitan nimane è biridina, dabudine taudi sibo a kataie be nam Mamaitua sibo ai diboḡa munage.

2

Pol Timoti ya riuena da nema sibo ai taparoro bakona

¹ Taumi aba sibo koya voia dokena inam umanama: Noḡone taumi banaga be Mamaitua poudie ko midi be banaga aubaidima ko moiragi be Mamaitua koi baḡa da e sagudina. Be mate Mamaitua koi kaiwena banaga matabudi aubaidima. ² Inam kauinama teneḡine nama ko moiragina guyaguyau be waibabada aubaidima, da tauda tokare subae tà mia genuana be Mamaitua tà voteyeteye be tàì kawa vivirana. ³ Uma inam kaua verenama Mamaitua tauwai yawasanidama, inam kauine ewai nuaverena. ⁴ Baninama tauna e ḡoēḡoena da banaga matabudi yawasana kenakena nonoḡinama sibo a banavi be riukaua waikatakatainama sibo a kataiena. ⁵ Baninama Mamaitua inam tenaḡa, be banaga tenaḡa Mamaitua be banaga poude e midimidina, inam Yesu Keriso, ⁶ tauna vutuna banaga matabuda taumidiḡaḡaridama, baninama Mamaitua raḡan ya boruborue Yesu Keriso na yawasanama yai utaena banaga matabudi aubaidima, be yodi Mamaitua nuanama ya subana. ⁷ Taugu yà riuriu kauana be nam ama kaikaiyovuna, inam kauinama aubainama Bada ya vinegu da taugu apasol

be vari verenama yà rauguguyena. Be taugu riukaua waikatakatainama eteni banegidima yài kataidi be tai sumaḡana.

Tautauḡoma be waiwaivi adi giuma

⁸ Taugu yà ḡoeḡoena taumi deḡo deḡo ami kaba wairawateḡeima raḡanine, tautauḡoma nimedima ta kaisuḡu be ta moimoiragina raḡanine, taudi sibo nopodima vereverene a moimoiragina, be nam medi bo ḡasi mate. ⁹ Be mate yà ḡoeḡoena da waiwaivi sibo ai gara kaua be tubuḡidima sibo a semo kauedina. Be nam yaba waimataveraver-audie debedima a waisiedi, be nam anibasa yabedima sibo a kotedi maika gara waimataveraveraudima, bo waisia ḡesaudima tabutabu maika posaru bo komakoma, inam avedi. ¹⁰ Deḡoda taudi Mamaitua tawai sumaḡena, naumeki da taudi voia veredie nopodima sibo ai siana, inam nama waisianama Mamaitua matane ya verena.

¹¹ Taparoro babadidima tawai katakataka raḡanine, waiwaivi sibo a voyaḡota, a kayokoa be ai beavaia ḡomana, be tautauḡoma adi waibadama dibune sibo a miana. ¹² Be taugu nam waiwaivi amawai aninedina da taudi tautauḡoma sibo ai katakataidi, ibewa da taudi sibo ai nuatuḡutuḡu, be nam sibo tautauḡoma adi gabuma a paḡo be ai bada. ¹³ Baninama Mamaitua noḡone Adam ya voia dokena, be muriḡa Ivi. ¹⁴ Be Seitan Ivi ya kaiyovue da ya beku be gewagewa ya voiena, be nam Adam. ¹⁵ Be waiwaivi adi noyama naumeki da sibo ai natunatunana. Be mate adi waisumaḡama Keriso ḡarone, be adi wainuapaḡoma sibo a kaiguratedi,

be a mia kauana Mamaitua na ġoane nama. Inam kedane tokare Mamaitua ei yawasanidina.

3

Ekalesia babadidima adi ġiuma

¹ Uma ġiunama yodi aba yà riuemina inam riukaua: Deġoda aita ekalesia debanama waibadenama e ġoeġoena, inam naumeki tauna noya verenama e ġoeġoena. ² Be inam baneginama tauna na yawasanama sibo umanama:

- Tauna yawasana didimane miemieninama,
- be nam aba e voia waigewa da banaga tai ġiugie.
- Be tauna waivi tenaġa e naġi be vutunaġa e rabena,
- be inam baneginama miamia genuaninama, be nam voivoia yabayababina,
- be tauna na noġotama matabudi didimandiġa,
- be tauna voyaġota be vivira baneginama,
- be banaga na vadae ta tavatavana taurabe kaudima.
- Be tauna Mamaitua na damma tauwai katakataidima,
- ³ be nam tegobua banegina,
- be nam sorukeakea banegina.
- Tauna vovoyaġotinama be nam kayokayo medimedina,
- be nam mane tauwai nuapaġoenama banegina.
- ⁴ Tauna na vadama banegidima ei bada kaue-dina keda verene, be e kita da na sedama

tauna ta voteyeteyena. ⁵ Be deḡoda tauna na vadama banegidima ḡarodie nam ei bada kaua, inam tokare nam tenetenegina da Mamaitua na damma ḡarodie ei bada.

- ⁶ Be tauna nam sibo waisumaḡa vaunama banegina, baninama deḡoda tauna noponama rauguyaguyau e moḡavu, be tokare kovoga e banavina maika Seitan.
- ⁷ Be banaga nam waiwaisumeḡidi mate tauna sibo a vivivivirena be a kawakawa saḡena, be deḡoda ibewa, inam tokare banaga tai giugiue be Diaboro na kwaroe e raukaisaḡa be e tikonina.

⁸ Be kauinama teneginama ekalesia taurabedima nama.

- Banaga matedie taudi banaga viviviredima,
- be nam banaga tauriu waimatakoedi.
- Be nam tegobua banegidi,
- be nam kaiyovue a rarau mane bo a rarau purapura.
- ⁹ Taudi adi noḡotama didimane waisumaḡa waikatakataidima ta kaididina. Inam vutuna Mamaitua yai maḡatarina ḡarode.
- ¹⁰ Noḡone ko kita wairuvedi, be deḡoda nam aba gewagewanama ḡarodie ko banavi, naumeki da taudi Mamaitua na damma ta rabedina.

¹¹ Be kauinama tenegine adi waiwaivima nama.

- Banaga matedie taudi waiwaivi viviviredima,
- be nam tawai mena bo tawai karakarakutu.
- Be taudi miamia genuanidima, be nam voivoia yabayababedi,
- be taudi waiwaivi patupatudima.

¹² Be ekalesia taurabename tauna waivi tenaḡa

kavakava ya naḡina. Be tauna na sedama be na vadama banegidima ei bada kauedina keda verene. ¹³ Deḡoda ekalesia taurabenama e noya kauana, banaga tauna tokare ta kawa saḡe, be tauna ma raudebatorana Bada Yesu Keriso ei matematena banaga noḡodie.

Mamaitua waikatakatai riuriukauinama ewai maḡatarina

¹⁴ Taugu yà noḡonoḡotina da raḡan ḡaubonaḡa yà verauna ḡaromie, be taugu yaḡoro uma letanama yà girugirumina tam ḡarome, ¹⁵ baninama deḡoda taugu nam yà verau, tam kaite kuya kataiena da Mamaitua na vadae tauwai sumaḡa nema sibo a vivira bakona. Taudi vutudi riukaua Mamaitua miamia nonoḡinama na damma, vutuna aubainama taudi Mamaitua na waikatakataima kadi tuatuama.

¹⁶ Mamaitua waisumaḡa riuriukauinama yai maḡatarina ḡarode, nam aniriuriu nuababaḡe, baninama inam umanama, Keriso tubuḡe ya maḡatarana, be Arua Babau ewai maḡatarana da Keriso tauna naumeki didimana baneginama.

Be anea tauna a kitana.

Be tauwai sumaḡa dam matabuna ḡarodie tauna a rauguguyena, be banaga dobu matabuna tauna ai sumaḡe, be Mamaitua ya nawena marae.

4

Tauwai katakatai kaikaiyovudima

¹ Arua Babau umanama e riuriu yaḡedana, da raḡan damodie tauwai sumaḡa ḡesaudima tokare

waisumaḡa ta gosedi be arua kaikaiyovudima tai muriwatanedina. Be mate taudi penama adi waikatakataima tai sumaḡedi be tai muriwatanedina. ² Banaga kaikaiyovudima taudi inam waikatakataidima kaikaiyovudima tawai daberaridina, baninama noḡota veredima taudi ḡarodie matabudi a yanisarana.

³ Inam banegidima tawai katakataka da banaga nam sibo ai naḡi. Be mate ta riuriuna da kani ḡesaudima banaga sibo a widinedina. Be inam nam nama. Mamaitua kani matabudi ya voiedina anikani aubainama, be aitaḡa riukaua tawai sumaḡena, taudi Mamaitua tai kaiwe be inam kanidima ta kanidina. ⁴ Yaba matabuna Mamaitua ya voivoiedina inam taudi yaba veredima, be nam sibo tē riutuaḡaiedi. Tauda Mamaitua sibo tēi kaiwe be muriḡa da tē kanina, be Mamaitua matane inam kanidima matabudi veredima, ⁵ baninama inam kanidima Mamaitua riune be moiragie tokare kani babaudima ta tubuḡana.

Ekalesia babadidima nema sibo a mia be a noya bakona

⁶ Deḡoda inam giudima nama tauwai sumaḡa kwai katakataidina, naumeki da tam inam Yesu Keriso na taunoyama veremma. Inam kedane tokare banaga ta kataiem da tam Bada kwawai sumaḡena, be riunama vutuna kwawai muriwatane be kwa kanikani bagibagiena. ⁷ Giu poredima kaikaiyovudima be bua giudima kwa gosedina. Be kwa kita da tam kwa kaigurate be Mamaitua na ḡoane nama kwa miana. ⁸ Be yawasana tubuḡe tã kaiguratena inam naumeki,

be tokare damone nam aba. Be yawasana Arue tà kaiguratena, inam ya vere kauana, baninama damone yawasana kenakena nonoġinama yodi da nokoi tokare tà banavina. ⁹ Riu matabudi è riuriuemna inam riukaua, be inam riudima sibo kuyai aninedi be kuya ragaudina. ¹⁰ Tauda tà noyanoya guratana da Mamaitua riunama tàì daberarina da banaga tàì sumaġe be yawasana tà banavina. Baninama tauda Mamaitua yawawayasaninama tàwai sumaġena. Tauna vutuna banaga matabudi ei yawasanidina, deġoda taudi tai sumaġena.

¹¹ Inam kaudidima banaga kwa riu vavasagēdi be kwai katakataidina. ¹² Tam banaga vaumma, be nam aitau sibo ya kita waiyovoġem. Tam banaga matedie voia verediġa kwa voiedina, am giue, am yawasanae, am wainuapaġoe, am waisumaġe, yodibe banaga tokare ta kitam be tai muriwatanemna. Be yawasana miremiredima nam kwa voiedi. ¹³ Be girugiruminama poranama be vaunama patara noġodie kwa siesievidi, kwa rarau guguyedi be banaga kwawai katakataidi be taugu yà verau munaġana.

¹⁴ Be puyo Arue Mamaitua ya utemna nam kwa gose. Raġanine ekalesia babadidima nimedima debame a boru be am noyama awai perovetaena, dabudine inam puyonama kuya paġona. ¹⁵ Uma kaudidima matabudi è riuriuemna kwa voiedina nuama tabutabune, dabudine banaga tokare ta kita da tam am waisumaġama e moramorabana. ¹⁶ Am yawasanama be am waikatakataima raġan matabuna kwa kita yaġedina, baninama deġoda nama kwa voiana, tokare tam be tauwai beavaia mate kwai yawasana tenaġemina.

5

¹ Nam airaḡan bada poranama kwa riu badobadoe, avedi, be nuatauḡa ḡarone kwa giuna maika kabe tam tamaḡomim. Be tautauḡoma vaudima ḡarodie kwa giuna maika kabe tam tasitasim.

² Be waiwaivi poredima ḡarodie kwa giuna maika kabe tam tinatinam, be guguini ḡarodie kwa giuna maika kabe tam nuvunuvum, be nam noḡota miremiredima mate.

Kaiyababa kadi raukurama

³ Deḡo kaiyababidima nam aitau taurabedi, inam taudi kwa rabe kauedina. ⁴ Be deḡoda kaiyababa na sedama bo yatayatanama tima miamia, naumeki da taudi sibo noḡone Mamaitua a vivire be adi dosima a rabe kauedina. Inam kauine taudi adi dosima be yateyatedima adi wairabarabama tawai maesina. Inam kauine Mamaitua ewai nuaverena.

⁵ Be deḡoda kaiyababa taunaḡa e miamiana, be nam aitau taurabena, tauna na noḡotama matabuna Mamaitua ḡarone ya boru, be kupi da suara e moiragi be sagu ewai baḡena. ⁶ Be deḡoda kaiyababa tubuḡinama e rarau guyaguyauena, inam waivinama kaite arue ya gurina, avedi da yawawayasaninama e miamiana. ⁷ Inam giudima banaga kwa riu vavasaḡedina. Yodibe tokare nam aitau ei wavudi be e riuna, “Tam nam dosi kuma raberabe kauedina.”

⁸ Be deḡo baneginama na vadama banegidima be na dosima nam e rabe kauedi, inam banaginama tauna na waisumaḡama e kawakawa koakoana. Inam baneginama na gewagewama

ya moraba vavasagāna, nam eteni banegidima maika.

⁹ Deḡoda ai kaiyababa e verauna isanama pepae boru saḡenama aubainama, kwa kita da tauna na modima 60 be nokoi ya naḡona. Tauna isanama kwa girumina da tauna sibo sagu ya paḡona. Be mate kwa kita da tauna na tauḡomama tenaḡa kavakava, ¹⁰ be banaga ta vivivirena tauna na voiamā veredima aubainama, maika seda ya yosiyosidi bo banaga na vadae a tavatavana taurabe kaudima, be tauna voyaḡote tauwai sumaḡa ḡarodie yawai taunoyana. Be banaga adi nuaboyae ya sagusagudi, be yaba veredima toitoi mate ya voivoiedina. Inam kaiyababinama isanama kwa girumina.

¹¹⁻¹² Be banaga vaudima tawai kaiyababana, taudi nam isedima pepae kwa girumidi. Bani-nama avedi da taudi adi saugama kaite a boru da kabe nam tai naḡi munaḡa. Be yaḡoro taudi vaudima aubainama tokare tubuḡa na ḡoanama e raurubudina, taudi tokare aba Keriso ḡarone a sausaugena ta noḡota tuaḡaie be deḡoda wainaḡi munaḡa ta ḡoena. Be inam kedane adi saugama tokare tai kati kotovi, be kovoḡa ta banavina. ¹³ Nam vutunaḡa be mate taudi matagayawa, be vadaḡa ta naḡo babara tawai karakarakutu, be banaga mududie giu ta ragaudi be ta giugiu nawedina kabe taudi adi giu. ¹⁴ Uma kauinama sabine yau raukurama kaiyababa vaudima ḡarodie yà boruboruna da taudi sibo ai naḡi, ai natunatuna be adi vadama a rabedina. Inam kedane na ḡaviama tokare nam teneteneḡina da ḡarone ei mena. ¹⁵ Be kaiyababa

ḡesaudima kaiteka Keriso a gose be Seitan tawai muriwatanena.

¹⁶ Deḡoda ai waivi Bada Yesu tauwai sumaḡenama, be na vadae kaiyababa e miamiana, naumeki da tauna sibo inam kaiyababinama ya rabe kauena, be nam ekalesia vita e utedi. Be kaiyababa ḡesaudima wainuatoitoidima nam aitanu da sibo a sagudi, naumeki da ekalesia taudi vutudi sibo a sagudina.

Mamaitua na damma babadidima adi giuma

¹⁷ Deḡoda ekalesia babadidima Mamaitua na damma tawai doka kauedina, naumeki da ko vivira kauedi be koi maesidina. Be aitauga da ta rarau guguya be tawai katakataina, taudi naumeki da maesa verenama ko utedina.

¹⁸ Baninama girugiruminama porane umanama ya riuna,

“Kau kaikaivainama ami noyama e voivoiena raḡanine, nam mudunama ko panitom, ko gose da tauna e kanina.”

be mate Bada Yesu ya riuna, “Taunoya naumeki da na maesama sibo ya paḡona.”

¹⁹ Ekalesia kana badama nam kwai wavu yababe, be deḡoda banaga rabui bo rabuiteḡa tai matamatana, inam naumeki. ²⁰ Be aitanu da gewagewa e voiena, tauna patara matedie kwa riu matai ḡomena, dabudi banaga ḡesaudima mate ta kita be ta nairana.

²¹ Mamaitua be Yesu Keriso be na aneama vinevinedima matedie ya riuriu vavasagemna da uma giudima kwa voteyetedina, be nam aitanu kwai muri naḡonaḡo. ²² (v22a) Nam kwai

paparana be ekalesia badanama vaunama debane nimamma kwa boru be kwai anina makaie, deḡoda na gewagewama tam mate tokare wavunama kwa paḡona. ²³ (-) ²⁴ Baninama kwa noḡoti da banaga ḡesaudima adi gewagewama banaga matabudi ta kitedi be ta katakataiena da inam banegidima tokare kovoḡa ta banavina. Be banaga ḡesaudima adi gewagewama semoe ta kenakenana, be yaḡoro tokare ḡavoe ta maḡatarana. ²⁵ Be teneginama nama banaga ḡesaudima adi voiamā veredima banaga matabudi ta kitedi be ta katakataiena. Be banaga ḡesaudima adi voiamā veredima semoe ta kenakenana, be yaḡoro tokare ḡavoe ta maḡatarana.

(v22b) Kwa kita da tam veremma, nama Mamaitua matane kwa miana. (v23) Nam upa taunaḡa kwa tegotego, be waen ḡaubonama mate kwa tegona kapomma anisagunama aubainama, baninama tam kana raḡanie kwa sidasidana aubainama.

6

Taunoya adi giuma

¹ Taunoya taudi adi babadama sibo a vivira kauedina. Inam kauine tokare Mamaitua isanama be dā waikatakataima nam ta kawa gewegewedi. ² Be deḡoda ami babadama waisumegidima, naumeki da ko vivira kauedi be nam ko noḡota tuatuaḡaiedi be ko riuna, “Aa, inam tuatuaḡadama, nam bonedima tã vaie.” Inam avedi, be ḡarodie ko noya guratana, baninama taumi matabumi tauwai sumaḡa, be inam kauine taumi taudi ko sagudina.

*Waikatakatai kaikaiyovudima be waiguyau ri-
uriukuainama*

Inam riukaidima kwai katakataidi, be tauwai sumaga matabudi kwa riu guratedi da taudi sibo inam riudima a voteyeteyedina. ³ Degoda aitau waikatakatai tabu ewai katakataimi, be da Badama Yesu Keriso na waikatakataima nam e ruva, bo Kuristen na mia kauama waikatakatainama nam e ruva, ⁴ inam baneginama nam aiyaba i kataiena, ibewa, tauna noponama rauguyaguyau be sida ya mogavuna. Vutuna aubainama ragan matabuna giu banidima debedie ewai sagasagana. Be inam waisagasaganama damone nuaragaraqa, waikawa gasigasi, unura be waikarakarakutu ta tubutubugana. ⁵ Inam nama banegidima ragan matabuna gewagewa tauwai tubugidima. Baninama taudi adi nogotama a sidana, be nopodima waitupa kaiyovu a mogavuna, be nam riukaua ti kataiena. Taudi tawai nogotana waikuristen inam kabe waiguyau anipagonama kedana.

⁶ Waikuristen nopone degoda aba te pagona inam naumeki, baninama tauda inam Arue tei guyauna. ⁷ Baninama tinadama yawai tubugidana raganine, tauda nam aiyaba te pogo be mate uma dobune te tubugana. Vutuna aubainama da kaba gurima raganine, nam tokare aiyaba ta pogo be mate ta nago. ⁸ Be degoda kani be gara te banavidina, inam naumeki. ⁹ Taudi aitauga da waiguyau ta goegoe guratena, taudi raurubue ta bekubekuna, maika kwaro kabe i tikotikonidi. Inam raganine taudi nopodie nogota gewegewedima be buebuedina toitoi ta

saḡasaḡana. Inam kaudie taudi gewagewae ta naḡonaḡona. ¹⁰ Baninama mane wainuapaḡoenama ko noḡoti da inam gewagewa tabu be tabu waramidima. Banaga ḡesaudima adi waisumaḡama a gosedina, baninama taudi mane ragaudima a ḡoe guratena, aubainama a voia munāḡedi da nopodima nuaboya da nuaboya ya moḡavuna.

¹¹ Be tam Mamaitua ḡaronama aubainama, inam yawasanidima kwa gosaga be kwa raurubu gurata da yawasana didimanidie kwa mi-ana. Be mate Mamaitua na ḡoane kwa mi-ana, be waisumaḡa, wainuapaḡo, damipore be voyaḡota, vutudi kwa ragaudi da ḡarome. ¹² Be waisumaḡa aubainama waiḡavia verene kwai ḡaviana, yodibe yawasana kenakena nonoḡinama kwa paḡona tam aubaimma. Tam matamata toitoi noḡodie kuya midie be kuya riuna da Keriso kuyai sumaḡena, inam raḡanine Mamaitua ya vinemna da inam yawasaninama kwa paḡona.

¹³ Mamaitua yaba matabuna yawasana tauutenama, be Yesu Keriso, tauna vutuna Pontis Paelat noḡone ya midie be riukaue ya giuna.

¹⁴ Taudi matedie taugu ya riuriu vavasaḡemna da uma giudima matabudi kwai muriwatanedina da tam tokare nam aita abe gewagewanama ḡarome e vato. Nama kwa miana, naumeki da raḡan boruborune da Badama Yesu Keriso e maḡatarana. ¹⁵ Inam raḡaninama Mamaitua boni ya vinena, tauna vutuna Mamaitua vere vavasaḡinama. Be taunaḡa riukaua Bada be guyaguyau matabudi adi guyauma, be babada matabudi adi Badama. ¹⁶ Tauna taunaḡa nam

airaḡan e guri. Be na kaba miama inam yana boruminama yai rewapana vavasagana, nam aitau tenetenegina da na kaba miama diane e naḡo. Be nam aitau deḡo, boni da yodi i kita rubuna. Tauna isanama tà kaisuḡu nonoḡena, be rewapana tauna ḡarone e kenakena nonoḡana. Inam riukaua.

¹⁷ Banaga waiguyaudima uma dobune kwa riu vavasagedi da taudi nopodie nam sibo a rauguyaguyau, bo adi noḡotama adi waiguyaue a biridi, avedi, baninama inam yabedima matabudi tokare ta samoana. Be taudi Mamaitua vutuna tai sumaḡena. Tauna vutuna yaba toitoi veredima nuadama aniwai nuaveredima aubainama e uteutedana. ¹⁸ Be kwa riu vavasagedi da taudi vere ta voiedi be tai guyauna. Be nuedima tabutabune adi banagama ḡarodie ta pairuna. ¹⁹ Inam kauine taudi ta vovo kaukauana adi waiguyauma raḡan muriḡa aubainama da taudi tokare yawasana ta paḡona, be inam yawasaninama tauna riuriukauinama.

²⁰ Timoti, kwa rabe kauem be am noyama aba Mamaitua ya uteutemna, vutunaḡa kwa kita watanina. Be banaga adi giuma kaikaiyovudima nam kwa ragaudi. Inam giudima nam Mamaitua na riukauama timawai muriwatanena. Taudi Mamaitua tauwai diboginama, be taudi ta riuriuna da inam vutuna kabe Mamaitua na katai, inam matabuna kaiyovu. ²¹ Be taudi ta riuriuna da Mamaitua na riukauama kabe ti katakataie, ibewa da taudi waisumaḡa riuriukauinama a yakasina.

Mamaitua na raukiviverema ġaromie e kenana.

Vari Verenama
The New Testament in the Dawawa Language of
Papua New Guinea
Nupela Testamen long tokples Dawawa long Niugini
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 21 Feb 2024 from source files dated 31 Aug 2023

9b8bda32-db42-5be3-9d24-4e4a5d5f65b2